

現代生活藝術系列

華嚴經疏論纂要 15

— 世界成就品

華藏淨宗學會印贈

大方廣佛華嚴經疏論纂要卷第十五

五臺山清涼國師澄觀疏鈔

太原方山長者李通玄論

閩鼓山私淑比丘道需纂要

世界成就品第四

○四門中初來意

〔疏〕來意者。前說緣既具。此下正陳所說總明果相。

答法界安立海問。故此品來。鈔初來意者。疏文有二。初總明分來對前。

二品以爲說緣。生下三品爲正所說。總明果相。下二別明品來。此句對下華藏爲別別明本師之所

嚴淨。故指此品以爲總明諸佛果相。

○二釋名

〔疏〕釋名者。世謂三世。墮去來今故。界謂方分。有彼此故。又世謂隱覆。界亦分齊。謂諸有爲可破壞世。卽隱覆無爲不可壞法。從真性起。同無爲法。卽隱覆有爲可破壞世。各不相雜。是其分齊。是故感娑婆者。對華藏而見娑婆。感華藏者。對娑婆而見華藏。成就者。卽能成之緣。謂十緣等。能所合目。若以世界之成就。卽依主釋也。準梵本中云。世界海成就。下文辨海。譯人畧也。意云。佛果依正聞修方起。衆生業報。本自有之。故但標世界耳。

〔鈔〕世界有其二釋。一以破

壞釋世。二以隱覆釋世。若唯前解。今華藏利是可破壞。今爲此釋。今華藏利。從無爲起。同於真極。不可破壞。故感娑婆下。雙出不雜隱覆之義。言成就下。二釋成就二字。能成之緣。通因及果。起具因緣。此一是因。體性依任等是果。故總具十門。世界成立。意云佛果下。出無海意。以利海莊嚴。是佛修起直語。世界衆生業成。無始有之。故但云世界。雖爲譯家出理。實則海言切要。

○三宗趣

疏宗趣者。標列無邊勝德。廣釋所知世界海爲宗。然其意趣。乃有種種。一令諸菩薩發大信解。悟入爲趣。謂令知佛及菩薩大悲行海。廣覆無盡衆生界。做而行故。世界無邊。悉嚴淨故。衆生無邊。悉化度故。利由心異。當淨自心及他心故。世界重重。無

盡無盡。以大行願。悉充滿故。佛界生界。非一非異。能正了知。成大智故。未能了者。熏成種故。皆意趣也。亦爲顯此深意。故此品來。故下頌云。離諸諂誑。心清淨。常樂慈悲。性歡喜。志欲廣大。深信人。彼聞此法。生欣悅。若不聞此。無邊無盡。無二之境。滯於權小。普賢行願。何由可成。故普賢自說。爲令衆生等文。皆是此品之意趣也。

〔論〕今釋此品。畧作三門分別。一釋品名目。二釋品來意。三隨文釋義。一釋品名目者。爲明世界海。依住形相。苦樂淨穢。皆是衆生自業果報之所莊嚴。

不從他有。佛菩薩世界海。依大願力。依自體清淨  
法性力。依諸波羅密諸行海等。自體清淨力。依爲  
度衆生大慈悲智力。以不思議變化力之所成就。  
故名世界成就品。一釋品來意者。此品所來大意  
有五。一答前世三十七問佛海衆生海波羅密  
海等。此品示業果報。示法果報。答前所問故。明向  
前是佛光明神力答。此品示其佛行海。眼耳鼻舌  
波羅密海。徧法界海。衆生業行海故。三十七問。一  
時總答。令大衆海悟佛所行。入普賢菩薩所行也。  
故號佛華嚴經。一令諸現在未來始發菩提心者。

識佛所行及菩薩行海。佛菩薩大慈悲海。能普徧法界海。衆生行業海。而利益之。令到究竟岸故。既見是已。而做做之。學佛行故。令始發心者。悲智圓滿。行解不錯謬故。三。令始發心菩薩。知衆生業報同異差別。由心造故。四。令始發心者。知衆生界廣大。等法界虛空界。如影相入。重重無盡。依住各別。佛菩薩行悉充滿故。五。令始發心菩薩。知諸佛菩薩境界海。衆生境界。一異不可得故。隨衆生自業轉變利海轉變故。隨自業成壞。利海成壞故。以衆因緣故。此品須來。發初蒙故。若無此品。初心菩薩。

云何知其如來攝生。如來行門。及以衆行業世界  
廣狹之相。若不知者。依何發心。乘佛大悲。普濟願  
行廣度。以是義故。如下頌云。離諸諂誑心清淨。常  
樂慈悲性歡喜。志欲廣大。深信人。彼聞此法。生欣  
悅。安住普賢諸願地。修行菩薩清淨道。觀察法界  
如虛空。此乃能知佛行處。若不說衆生界。法界佛  
界。菩薩境界。虛空界。無二無盡。如影重重。依住者。  
所有發心者。設不入二乘道。修菩薩行。但得權教  
菩薩心。常染淨。而有限礙。不入佛境界故。有自佛  
他佛。及以國利分劑。有往來所依處故。如三乘中



所說淨土在於他方。菩薩願生其中是也。說此品者。意欲令初發菩提心者。知衆生境界。諸佛境界。廣大之相。重重無礙。無盡之相。佛及菩薩願行。含覆利益。纖塵無遺。故此品須來。三隨文釋義者。此之一品。有十一段經文。從初一段長行。一段偈頌。是此品中序分。後十段長行。及十段偈頌。是正說。乃至華藏世界海。總通此品。爲世界成就品。總爲正說分。

○四釋文者。三品正陳法海。於中分二。初二品明果。後一品辨因。然有二意。一約兼明。則前二品

通答前三十句果問。後一品答前十句因問。說  
因爲欲成果。從多而說。分名舉果。二將前二品  
望前品末三問。通答依正。若望下廣文。正明於  
依。旁顯於正。畱其正報。後分廣故。於中初品。通  
辨諸佛及諸衆生所有利海。後品別明本師之  
所嚴淨。又此品明成利之緣。後品別辨果相。故  
此品答安立之問。其中雖明形等。亦是緣故。今  
初分二。先總標綱要。卽爲本分。後正陳本義。卽  
是說分。前中亦二。先承力徧觀。後牒問許說。今

初

爾時普賢菩薩摩訶薩以佛神力徧觀察一切世界海。一切衆生海。一切諸佛海。一切法界海。一切衆生業海。一切衆生根欲海。一切諸佛法輪海。一切三世海。一切如來願力海。一切如來神變海。

〔疏〕上入三昧內契其源。今云徧觀外審其相。十海之義已如問釋。但小不次耳。但觀於十。已含餘三

十。佛海之中。具身等故。大願之中。含因等故。鈔但觀於

十下通難。難云。問有四十。何唯觀十。故答。意云。十海爲總。已含所餘三十。別問佛海之中者。是佛必有六根三業爲體。相炳著之十。必有德用圓備。謂佛地等。故具二十。大願海中。已攝因中發趣等十。故四十無遺。

○第二牒問許說於中分四。一牒問畧歎。二許說分齊。三所說成益。四讚勝誠聽。今初。

如是觀察已。普告一切道場衆海諸菩薩言。佛子。諸佛世尊。知一切世界海成壞清淨智不可思議。知一切衆生業海智不可思議。知一切法界安立海智不可思議。說一切無邊佛海智不可思議。入一切欲解根海智不可思議。一念普知一切三世智不可思議。顯示一切如來無量願海智不可思議。示現一切佛神變海智不可思議。轉法輪智不可思議。建立演說海不可思議。

疏先結前生後。後佛子下。正牒稱歎。卽從後向前。牒上果問三十句也。初十句。牒上世界海等十問。觀乃觀海。歎乃歎智者。智之與海。反覆相成。謂前自智觀海。微細難知。知唯佛智。方能究盡。海難思故。佛智難思。佛智難思。故海爲深廣。若爾。何不說智。而但說海。智離海境。安知其相。又表唯所證知。故但說海。十智望海。與問開合小異。名或小差。謂一中。前問及觀。但云世界海。今加成壞。望前與智中。亦有成壞之言。此乃廣畧之異耳。言清淨智者。離所知障。決斷分明。故初句貫下。置清淨言。餘皆

畧也。然皆以多故。廣故。深故。細故。重疊難知。迴超  
言念。皆云不思議也。二知衆生業海者。衆生卽報  
類差別。業卽善惡等殊。從此別義。觀中開爲二句。  
而因果雖殊。同是所化衆生。故此及問。并與智中  
竝合爲一。三卽世界都稱。或化衆生法。謂安立施  
設。方便軌則等也。四能化諸佛。數量無邊。五卽所  
化根欲差別難知。而問中合在後之五海。五海皆  
須知根欲故。六卽所應之時。前就所觀。但云三世。  
今就佛智。故云一念能知。其問及與智。皆云佛解  
脫海者。以一念普知三世。是佛不思議解脫故。七

稱性大願。爲現身說法徧化之因故。前問是名號海。及壽量海。與智之中。名普入法界一切世界海。智皆由願力故也。八應機作用。神變無方。九轉稱性大法輪海。若據問中。攝法輪海在演說中。若約向觀。攝演說海在法輪中。今此開二演說第十。謂隨方施設言音差別。及法輪隨機故。與智中亦開名佛音聲智。

清淨佛身不可思議。無邊色相海。普照明不可思議。相及隨好皆清淨不可思議。無邊色相光明輪海。具足清淨不可思議。種種色相光明雲海不可思議。殊

勝寶燄海不可思議。成就言音海不可思議。示現三種自在海調伏成熟一切衆生不可思議。勇猛調伏諸衆生海無空過者不可思議。

〔疏〕第二九句。牒上六根三業十問。向十約智。明不思議。此下直就法體爲不思議。又望問。開合影畧。顯無盡故。以總收別。但廣身光等。一應機之身。修短難測。二現金銀等。色類無邊。三十蓮華藏剎塵數相。好過於此。四圓光大小。隨機無盡。五隨緣放光。色類非一。六常光如焰。具衆寶色。七圓音無盡。深廣難測。八三輪攝化。謂神通等。九調令成益。得



果不空然其調伏曲有三種。一者始終軟語。應將攝者而將攝故。二者始終麤語。應折伏者而折伏故。三者有時軟語。有時麤語。應成熟者而成熟故。由具此三。故無空過。鈔以總收別者。以三業之總者。等取前光明及音聲智慧二。光爲身音聲屬口。智慧是意。今文並具。故致等言。卽開三業而爲十耳。

安住佛地不可思議。入如來境界不可思議。威力護持不可思議。觀察一切佛智所行不可思議。諸力圓滿無能摧伏不可思議。無畏功德無能過者不可思議。住無差別三昧不可思議。神通變化不可思議。清

淨自在智不可思議。一切佛法無能毀壞不可思議。  
〔疏〕第三十句。牒上最初德用圓備十問。前問中畧  
無變化及自在二句。以攝在無能攝取句中。義如  
前會。亦以前文十海有故。神變屬身。自在屬智。餘  
竝可知。

○第二許說分齊

如是等一切法。我當承佛神力及一切如來威神力  
故。具足宣說。

〔疏〕謂具足說故。承佛力者。當會佛也。若言具者。何  
以下文。唯說安立及世界海耶。經來不盡故。又雖

說二。世界海亦已通具三十句問。鈔若言具者下。問也。答有二意。

一經來未盡約顯現答。遮那品末無有謂界必有結束故。若經具來應更答餘三十八問。

生而依住故。有佛現故。安立異故。行業感故。餘可

意求。謂界必有生下。二出所兼之相畧出三海。謂一衆生。二佛。三行業及能兼二。已有五海。言

餘可意求者。即餘五海等。謂一有生必有根欲為一。有佛必由願力為二。必有神變普周為三。必轉

法益生為四。必有作用解脫為五。則十海具矣。其海既爾。具餘例然。此依別答四十問說。若約十海

為總。此但答二。下別答八。已如現相。品明則十海之中兼餘三十。

○第三說所成益

為令衆生入佛智慧海故。為令一切菩薩於佛功德

海中得安住故。為令一切世界海一切佛自在所莊

嚴故爲令一切劫海中如來種性恒不斷故爲令於一切世界海中顯示諸法真實性故爲令隨一切衆生無量解海而演說故爲令隨一切衆生諸根海方便令生諸佛法故爲令隨一切衆生樂欲海摧破一切障礙山故爲令隨一切衆生心行海令淨修治出要道故爲令一切菩薩安住普賢願海中故

〔疏〕十句攝爲五對。一證智成福對。二嚴利紹種對。亦卽時處對。三顯義演教對。四生善滅惡對。五淨業普願對。文竝可知。此亦通爲一經教起之所因也。此十亦對前十海十智。恐繁不會。

○第四讚勝勸聽二初長行辨意後偈頌正顯今  
初

是時普賢菩薩復欲令無量道場眾海生歡喜故令  
於一切法增長愛樂故令生廣大真實信解海故令  
淨治普門法界藏身故令安立普賢願海故令淨治  
入三世平等智眼故令增長普照一切世間藏大慧  
海故令生陀羅尼力持一切法輪故令於一切道場  
中盡佛境界悉開示故令開闡一切如來法門故令  
增長法界廣大甚深一切智性故卽說頌言

〔疏〕文十一句初一總標謂令聞法必生喜故餘十

別顯喜義亦爲五對。初二樂法生信對。二證性立願對。三了真入俗對。四持法示佛對。五開法增智對。如文竝顯。

○二偈頌正顯

智慧甚深功德海

普現十方無量國

隨諸衆生所應見

光明徧照轉法輪

十方刹海叵思議

佛無量劫皆嚴淨

爲化衆生使成熟

出興一切諸國土

佛境甚深難可思

普示衆生令得入

其心樂小著諸有

不能通達佛所悟

若有淨信堅固心

常得親近善知識

一切諸佛與其力

此乃能入如來智

離諸諂誑心清淨

常樂慈悲性歡喜

志欲廣大深信人

彼聞此法生欣悅

安住普賢諸願地

修行菩薩清淨道

觀察法界如虛空

此乃能知佛行處

此諸菩薩獲善利

見佛一切神通力

修餘道者莫能知

普賢行人方得悟

衆生廣大無有邊

如來一切皆護念

轉正法輪靡不至

毗盧遮那境界力

一切刹土入我身

所住諸佛亦復然

汝應觀我諸毛孔

我今示汝佛境界

普賢行願無邊際

我已修行得具足

普眼境界廣大身

是佛所行應諦聽

疏十頌分二。初八讚。後二勸。前中亦二。初二明佛

出現意。後六辨定法器。於中初一揀非器。次四示

法器。後一結歸佛力。及後二勸。文竝可知。然通此

十偈。亦是牒問以讚。前長行總顯難思。此下畧示

難思之相。而三十句間列不次。含義竝足。欲委配

釋。恐厭繁文。



○第二正陳本義分中。分二。初結集生起。二普賢顯說。於三十句果問中。廣釋世界安立海問。餘並攝之。文分爲二。初標舉章門。後依章別釋。今初。

爾時普賢菩薩摩訶薩告諸大衆言。諸佛子。世界海有十種事。過去現在未來諸佛已說現說當說。何者爲十。所謂世界海起具因緣。世界海所依住。世界海形狀。世界海體性。世界海莊嚴。世界海清淨。世界海佛出興。世界海劫住。世界海劫轉變差別。世界海無差別門。諸佛子。略說世界海有此十事。若廣說者。與

世界海微塵數等。過去現在未來諸佛已說。現說當說。

疏分三。一立數顯同。先告佛子者。使時情注其耳目也。世界廣深。目之爲海。謂積刹成種。積種成海。海無別體。世界都名。然事類廣多。畧舉其十。以表無盡。二世同說彰其要勝。又顯說決定無改易也。二何者下。徵數列異。一明攬緣成立。二成已依任。三外狀區分。四內體差別。五寶等莊校。六垢穢不生。七佛出差殊。八劫任修短。九隨業改變。十包容必均。此十亦攝十八圓滿。後品當會。二諸佛子下。

結畧顯廣。言世界海塵者。智猶難測。言豈具陳。非  
證法雲。安受茲說。然上十事。於一一刹。多少不定。  
具緣一種。或一。或二。或三。或多。或成四句。謂一成  
一。一成一切等。清淨一種。或一。或多。或亦無之。以  
有純穢利故。其次七事。各各唯一。謂依空住者。非  
依光等故。餘準思之。其無差別。一切皆具。以約體  
性平等。佛力融攝。故說無差。所以染淨皆具也。

○第二依章別釋者。十事不同。則爲十段。一一皆  
有長行與偈。長行中各三。謂標釋結。今初起具

因緣

諸佛子。略說以十種因緣故。一切世界海已成現成。當成。何者爲十。所謂如來神力故。法應如是故。一切衆生行業故。一切菩薩成一切智所得故。一切衆生及諸菩薩同集善根故。一切菩薩嚴淨國土願力故。一切菩薩成就不退行願故。一切菩薩清淨勝解自在故。一切如來善根所流。及一切諸佛成道時自在勢力故。普賢菩薩自在願力故。諸佛子。是爲略說十種因緣。若廣說者。有世界海微塵數。

〔疏標中畧舉十種。通成三世一切佛刹。一何者下釋。然佛土之義。雖有多種。不出其二。一法性土。二

受用土。三變化土。若開受用。有自有他。則成四土。  
統唯二種。謂淨及穢。或性及相融而爲一。有異餘  
宗。又此淨土。一質不成。淨穢虧盈。異質不成。一理  
齊平。有質不成。搜源則冥。無質不成。緣起萬形。故  
形奪圓融。無有障礙。土既不等。因緣亦殊。今文十  
中。初三通顯。次四別明。後三卽融攝轉變。言初三  
者。一如來神力者。謂一切淨穢等土。皆是如來通  
慧力成爲物而取擬。將普應佛應統之。皆稱佛土。  
故蓮華藏海佛所嚴淨。而內含淨穢。然就佛言之。  
故無國而不淨也。既卽穢而淨。故不思議。二法如

是者。梵云逵磨多。此云法爾。或曰法性。若是法性。卽以本識如來藏身爲所依持。恆頓變起外諸器界。若云法爾者。謂有問言。何以諸佛衆生起於刹土。答云。法應如是。不可致詰。若會此二。謂法應如是。藏識變起。三衆生業力者。業有善惡。國有淨穢。故淨名以萬行爲因。又云。衆生之類。是菩薩佛土。謂法性雖一。隨業成異。佛隨異類。取土攝生。涅槃微善。觀經三心等。其類非一。上三。初因。二緣。三因。鈔涅槃微善下。別引他經。成其初義。卽二十一經。高貴德王菩薩品。璠黎光菩薩從不動世界而來。無畏菩薩問佛。此土衆生。當造何業。而得生彼。不動世界。佛以偈答。廣列十善。一。皆生。言微善者。

彼有偈云。若於佛法僧。供養一香燈。乃至獻一華。則生不動國。若為怖畏故。利養及福德。書是經。一偈。則生不動國。造像若佛塔。猶如大姆指。常生歡喜心。則生不動國。是也。觀經三心者。有三種三心。第一佛為韋提希現淨土。竟韋提希願生求因。佛言。欲生彼國。當修三福。一者孝養父母。奉事師長。慈心不殺。修十善業。二者受持三歸。具足眾戒。不犯威儀。三者發菩提心。深信因果。讀誦大乘。勸進行者。如是三事。名為淨業。佛告阿難。及韋提希。汝今知不。此三種業。過去未來現在。諸佛淨業。正因。次四別明者。有因有緣。初一自受用土因。大圓鏡智之所成故。二變化土因。謂眾生菩薩共構一緣。各隨行業來生其國。凡聖同居。三四二種。他受用土因。然初即初地已上。如十大願中。修淨土願是也。後即八地已上。功用不退行之所成故。八地中。

有淨土分。後三融攝者。通於因緣。初一。卽八地已上。攪大海爲酥酪。變大地爲黃金。以染爲淨。以淨爲染。自在攝生故。十自在中。有利自在。窮其因者。清淨勝解。勝解印持。隨心變故。次一。謂成正覺時。其身充滿十方世界。微塵刹土。念劫圓融。一時成立。由二種因。一。善根所流。語因中也。二。成道勢力。明果用也。此一受用變化相融也。卽如經初。摩竭陀地堅固等。後一。無間成與不成。常能融攝。又前是妙覺。此是等覺。其法性土。通爲諸土之體。窮其因者。有正有助。謂法爾爲其正因。以一切智及總



以諸因而爲緣因。故其後三亦融前土。非有別體。其法性土下。第三料揀妨難。問上之十句。舍於四土。何以特明三土。因邪。故爲此釋。次復問云。四土之外。別說圓融。應有五土。故今答云。故其後三。但融他四。卽是我宗。非別有一圓融之因。亦如上說。又說淨土總有二義。一者行淨業爲因。感淨相果。二以德業爲因。感自在淨果。行業始自凡夫。終至十地。德業始起不動。終至如來。故第一別明是行業淨。第三融攝。是自在淨。第一總明。具斯二淨。故疏爲三。又此十事。展轉生起。謂諸佛土。總由佛力。何以由之。法如是故。法爾云何。而有異耶。業不同故。衆生由業。佛復由何。成一切智之所變故。生佛有異。何以凡聖同居。同構一緣故。何以復有純菩薩國。菩薩願行力故。旣由行業。何可轉變。勝解自在。

故云何復得融攝重重。佛及普賢自在力故。三諸佛子下。結畧顯廣。如前已釋。

○第二偈頌

爾時普賢菩薩欲重宣其義承佛威力觀察十方而說頌言

所說無邊衆刹海

毗盧遮那悉嚴淨

世尊境界不思議

智慧神通力如是

〔疏〕偈頌多以果顯因。文有九偈。束爲八段。第一偈頌佛神力。據此無邊刹海。皆遮那嚴淨。則下嚴華藏。猶是分明。理實而言。願周法界。

菩薩修行諸願海

普隨衆生心所欲

衆生心行廣無邊

菩薩國土徧十方

〔疏〕次一超頌衆生菩薩同集善根

菩薩趣於一切智

勤修種種自在力

無量願海普出生

廣大刹土皆成就

〔疏〕三一頌頌第四成一切智自受用土因。前半因。

後半果。成唯識云。大圓鏡智相應淨識。由昔所修。

自利無漏純淨佛土。因緣成熟。從初成佛。盡未來。

際。相續變爲純淨佛土。周圓無際。衆寶莊嚴。配經。

可見

修諸行海無有邊

入佛境界亦無量

爲淨十方諸國土

一一土經無量劫

〔疏〕四一頌。頌第六嚴淨願力。及第七不退行願。修諸行海無有邊者。論云。謂平等性智大慈悲力。由昔所修利他無漏純淨佛土。因緣成熟。隨住十地菩薩所宜。變爲淨土。或小或大。或劣或勝。前後改變。上經雖云願力非無有行。謂分功用有無。長行。成其二句。皆他受用。故偈爲一。初句頌第六。次句頌第七。以八地已上。念念入法流。心心趣佛境。故後之半偈。通其二文。

衆生煩惱所擾濁

分別欲樂非一相

隨心造業不思議

一切剎海斯成立

〔疏〕五一偈。卻頌第三衆生行業。加造業因煩惱所擾。造於穢刹。欲樂非一。感土有殊。前與菩薩同修。必多善業。故此明於煩惱。

佛子剎海莊嚴藏

離垢光明寶所成

斯由廣大信解心

十方所住咸如是

〔疏〕六一頌。頌菩薩勝解。

菩薩能修普賢行

遊行法界徼塵道

塵中悉現無量刹

清淨廣大如虛空

〔疏〕七一頌超頌普賢願力。以普賢有三。一位前普賢。但發普賢心。卽是非今所用。二位中普賢。卽等覺位故。此居佛前。三位後普賢。謂得果不捨因行。故長行居後。

等虛空界現神通

悉詣道場諸佛所

蓮華座上示衆相

一一身包一切刹

一念普現於三世

一切刹海皆成立

佛以方便悉入中

此是毗盧所嚴淨

〔疏〕八有二偈。卻頌如來自在。前偈頌果用。後偈頌善流畧不頌法爾。法爾卽是法性。通故畧之。又第

七偈。依中有依。第八偈。正中有依。第九偈。融於三世。故三共顯融攝無礙。然其無礙。通有十種。諸教說土。或謂但是無常。或云心變。理事懸隔。多一不融。故今經宗。要辨無礙。或鈔但是無常者。通大小乘。懸隔明。非實教。一理事無礙。謂全同真性而利相宛然。經云。華藏世界海。法界無差別。莊嚴悉清淨。故引經十經偈。末句云。安住於虛空。今但取莊嚴為事。法界為理。無差別言。即是無礙。二成壞無礙。謂成即壞。壞即成等。二成壞中。不引文者。義易利種中。劫燒不思議。所現雖敗惡。其處常堅固。三廣陞無礙。不壞相而普周。故經云。體相如本無差別。無等無量。悉周徧等。

四相入無礙。下文云。以一刹種入一切。一切入一。

亦無餘。及此文云。身包一切等。其文非一。亦是一。

多無礙。所引即前偈前半。具云。以一刹種入一切。一切入一。亦無餘體。相如本無差別。無等。

無量悉。五相即無礙。文云。無量世界即一界故。五相。

即無礙。證文。六微細無礙。經云。清淨珠王布若雲。

炳然顯現諸佛影等。六清淨珠王等。即第八香水。河偈。具云。清淨珠王布若雲。

一切香河。悉彌覆其珠等。佛看間相。炳然顯現諸佛影。今但取初後二句。是顯微細之義。七隱。

顯無礙。謂染淨異類。隱顯等殊。見不同故。七隱。顯中。畧不。

引經。以義多故。即此中偈。隨心造業。不思議。一切利土斯成立。即其義也。以同處異見。故不思議。又。

形狀偈云。一切塵中所現利。皆是本願神通力。隨其心樂種種殊。於虛空中。悉能作。釋曰。既一塵隨。



樂種種皆作。則隱顯自在也。然疏中畧出二種。隱顯。一染淨。隱顯。如感娑婆者。對華藏而見。娑婆則淨。隱染顯。感華藏者。對娑婆而見。華藏則染。隱淨顯。故摩竭提國。其地金剛等。二明異類。隱顯。如須彌山。形世界一類顯時。江河等形。即皆隱也。長刹顯時。短刹則隱。餘可例知。八重現無

礙。謂於塵中見一切刹。刹內塵中見刹亦然。重重

無盡。如帝網故。八重現無礙。亦不引文。以華藏世界所有塵。一一塵中見法界。已頻

引故。若更引者。依住偈云。或有國土周法界。清淨離垢。從心現。如影如幻。廣無邊。如因陀羅各差別等。九主伴無礙。凡一世界。必有一切以為眷屬。下

經云。毘盧遮那昔所行。種種刹海皆清淨。種種刹。即眷屬也。十時處無礙。謂或於一刹現三世劫。或於一念現無量刹。如今第九偈文。又下文云。三世

所有諸莊嚴。摩尼果中皆顯現。此十無礙。同時具足。自在難知。散在諸文。可以六相融之。第一起具因緣竟。

○第二段所依住。通染淨也。

爾時普賢菩薩復告大眾言。諸佛子。一一世界海有世界海。微塵數所依住。所謂或依一切莊嚴住。或依虛空住。或依一切寶光明住。或依一切佛光明住。或依一切寶色光明住。或依一切佛音聲住。或依如幻業生大力阿脩羅形金剛手住。或依一切世主身住。或依一切菩薩身住。或依普賢菩薩願所生一切差

別莊嚴海住。諸佛子。世界海有如是等世界海微塵數所依住。

〔疏〕長行釋中十事。文竝可知。然依異者。由於心樂有差別故。謂一依莊嚴住者。樂飾好故。二樂無礙故。三樂卽質光故。四怖衆苦故。五愛離質光故。光作寶色。非寶發光。六奉聖教故。七求神護故。八求天護故。九菩薩願力所任持故。十普安衆生故。如何廣大世界。依有情等小類而住。此有二義。一外由內感故。說依身。此復有二。一宿因力。頌云。業力之所持故。二現在轉變力。卽世王菩薩神力任持。

攝屬已故。二由無漏。體事大小無礙。得相依依。如  
何廣大下。隨難別釋。釋第八九有二義釋。前通諸  
教後由無漏下。卽事事無礙宗。故上普賢云。一切  
刹土人我身。所在諸佛亦復然。汝  
應觀我諸毛孔。我今示汝佛境界。三諸佛子下。結  
爾時普賢菩薩欲重宣其義承佛威力觀察十方而  
說頌言

徧滿十方虛空界 所有一切諸國土

如來神力之所加 處處現前皆可見

〔疏〕頌有二十二文分兩別。初。總顯一切世界依  
佛神力而住。故梵本云。一切依佛神通現。長行不  
列者。若列。則餘九非佛神通。故偈以此文該於前

十。皆佛神力

或有種種諸國土

無非離垢寶所成

清淨摩尼最殊妙

熾然普現光明海

〔疏〕後二十一偈別頌前文。分之爲九。初一頌依莊嚴住。舉能顯所。莊嚴之具。皆寶成故。

或有清淨光明刹

依止虛空界而住

〔疏〕二半偈頌依空

或在摩尼寶海中

復有安住光明藏

〔疏〕三半偈頌依寶光明

如來處此衆會海

演說法輪皆巧妙

諸佛境界廣無邊 衆生見者心歡喜

〔疏〕四一偈頌佛光。稟佛教光成世界故

有以摩尼作嚴飾 狀如華燈廣分布

香燄光雲色熾然 覆以妙寶光明網

〔疏〕五一偈頌寶色光。明住。以嚴及覆影顯依住

或有刹土無邊際 安住蓮華深大海

廣博清淨與世殊 諸佛妙善莊嚴故

或有刹海隨輪轉 以佛威神得安住

諸菩薩衆徧在中 常見無央廣大寶

〔疏〕六二偈頌佛音聲。謂妙善所感音聲。有威神故

或有住於金剛手  
或復有住天主身  
毗盧遮那無上尊  
常於此處轉法輪

〔疏〕七一偈。頌七八二住。兼顯說法

或依寶樹平均住  
香燄雲中亦復然

或有依諸大水中  
有住堅固金剛海

或有依止金剛幢  
或有住於華海中

廣大神變無不周  
毗盧遮那此能現

或脩或短無量種  
其相旋環亦非一

妙莊嚴藏與世殊  
清淨修治乃能見

如是種種各差別  
一切皆依願海住

或有國土常在空

諸佛如雲悉充滿

或有在空懸覆住

或時而有或無有

或有國土極清淨

住於菩薩寶冠中

十方諸佛大神通

一切皆於此中見

諸佛音聲咸徧滿

斯由業力之所化

**[疏]**八有六偈。頌依菩薩身住。若樹若水。皆菩薩身。

菩薩現故。長行但云菩薩。此中兼依佛身。此中雖

有願力。是上宿善所持。非普賢願。

或有國土周法界

清淨離垢從心起

如影如幻廣無邊

如因陀網各差別



或現種種莊嚴藏

依止虛空而建立

諸業境界不思議

佛力顯示皆令見

〔疏〕九餘八頌。皆頌普賢願所生住。於中三初二偈。明廣大國土。周法界故。前偈明淨識所生。心外無體。故如影像。後偈難思業起。起不離空。

一一國土微塵內

念念示現諸佛刹

數皆無量等衆生

普賢所作恒如是

爲欲成熟衆生故

是中修行經劫海

廣大神變靡不興

法界之中悉周徧

法界國土一一塵

諸大刹海住其中

佛雲平等悉彌覆

於一切處咸充滿

如一塵中自在用

一切塵內亦復然

諸佛菩薩大神通

毗盧遮那悉能現

**[疏]**次四偈。明微細國土調生自在。然佛力現此。亦皆賢願收。故二段文皆兼佛力。

一切廣大諸刹土

如影如幻亦如燄

十方不見所從生

亦復無來無去處

滅壞生成互循環

於虛空中無斃已

莫不皆由清淨願

廣大業力之所持

**[疏]**末後二偈。彰刹體性。結歸有在。初偈明刹依性。

有。有卽非有。次半成壞更起。猶若循環。後半結歸  
普願。兼顯廣業。第二所依在竟。

○第三形相。亦通染淨。

爾時普賢菩薩復告大衆言。諸佛子。世界海有種種  
差別形相。所謂或圓。或方。或非圓方。無量差別。或如  
水漩形。或如山燄形。或如樹形。或如華形。或如宮殿  
形。或如衆生形。或如佛形。如是等有世界海微塵數。  
疏長行釋中。非圓方者。三維八隅。皆非圓方。故云  
無量差別。山焰形者。如山似焰。皆取上尖對上方  
圓等故。餘竝可知。三如是下。結。

爾時普賢菩薩欲重宣其義承佛威力觀察十方而說頌言

諸國土海種種別

種種莊嚴種種住

殊形共美徧十方

汝等咸應共觀察

疏頌中十偈初之一頌總讚勸觀

其狀或圓或有方

或復三維及八隅

摩尼輪狀蓮華等

一切皆由業今異

或有清淨皎莊嚴

真金間錯多殊好

門闥競開無壅滯

斯由業廣意無雜

疏餘皆正頌前義兼舉因顯果於中初二頌前十

段後七頌前無量差別。今初。摩尼輪者。卽水旋之類。淨焰莊嚴。頌上山焰。門闥競開。義兼宮殿。

刹海無邊差別藏

譬如雲布在虛空

寶輪布地妙莊嚴

諸佛光明照耀中

一切國土心分別

種種光明而照現

佛於如是刹海中

各各示現神通力

或有雜染或清淨

受苦受樂各差別

斯由業海不思議

諸流轉法恒如是

疏後七中分二。前三彰刹由因異。

一毛孔內難思刹

等微塵數種種住

一一皆有徧照尊

在衆會中宣妙法

於一塵中大小刹

種種差別如塵數

平坦高下各不同

佛悉往詣轉法輪

一切塵中所現刹

皆是本願神通力

隨其心樂種種殊

於虛空中悉能作

一切國土所有塵

一一塵中佛皆入

普爲衆生起神變

毗盧遮那法如是

疏後四明自在由佛。一毛孔內難思刹者。更有一

理。謂修行者。居自報土。各各不同。佛攝衆生所現

國土。似彼報故。重重而現。不離一毛。

鈔所現國土等者。如千蓋

燈共照一毛則一毛之上  
有千重光也準喻思法

第三形狀竟

○第四利體唯約淨刹

爾時普賢菩薩復告大衆言。諸佛子。應知世界海有  
種種體。所謂或以一切寶莊嚴爲體。或以一寶種種  
莊嚴爲體。或以一切寶光明爲體。或以種種色光明  
爲體。或以一切莊嚴光明爲體。或以不可壞金剛爲  
體。或以佛力持爲體。或以妙寶相爲體。或以佛變化  
爲體。或以日摩尼輪爲體。或以極微細寶爲體。或以  
一切寶燄爲體。或以種種香爲體。或以一切寶華冠  
爲體。或以一切寶影像爲體。或以一切莊嚴所示現

爲體。或以一念心。普示現境界爲體。或以菩薩形寶爲體。或以寶華。藥爲體。或以佛言音爲體。

疏長行畧辨二十種體。然其刹體諸教不同。或以八微爲體。或以唯心爲體。或法性爲體。或一切法爲體。今皆具之。謂衆寶等。卽是八微。加之佛音聲。卽九微也。一念心現是唯識頓變。佛變化者。或通果色。或一切法。今三世間互相作故。又融上諸說。爲無礙刹體。言日摩尼輪。卽日輪也。香通質氣。佛言爲體者。無礙體事故。又依如來說力起故。鈔諸教不

同下。卽五教出體。釋有二意。一則別配八微。是小乘唯心。是始教法性。是終頓二教。或一切法是圓



教二則通明圓教具四義頓教唯法性小乘唯八  
微始終二教通於前三若三各別卽三是始教若  
二無礙性相圓融卽是終教故法相宗出體云一  
法性土以真如爲體二實報土力無畏等一切功  
德無漏五蘊以爲體性若攝相歸性亦真如爲體  
三色相土攝境從心自利後得智爲體故佛地論  
云最極自在淨識爲相相卽體相若約相別卽四  
塵爲體四他受用土攝境從心利他後得智爲體  
攝相歸性亦以真如爲體若約相別亦是四塵五  
變化土同前他受用體是知始教具用三法圓教  
則以性融相相無礙故通一切法則事事無礙而  
爲其體是故疏云今皆具之次引經具收後融無  
礙

爾時普賢菩薩欲重宣其義承佛威力觀察十方而  
說頌言

或有諸刹海 妙寶所合成 堅固不可壞

安住寶蓮華

〔疏〕頌中十偈。初偈頌二。謂初二及第六不可壞金剛

或是淨光明 出生不可知 一切光莊嚴  
依止虛空住

〔疏〕次一偈。頌第三第四

或淨光爲體 復依光明住 光雲作嚴飾  
菩薩共遊處

〔疏〕三有一偈。頌第五一切莊嚴光明  
或有諸刹海 從於願力生 猶如影像住

取說不可得

〔疏〕四有一偈。頌二種體。願力生者。頌佛力持。如影像現。頌妙寶相。若兼二事。頌佛變化。

或以摩尼成 普放日藏光 珠輪以嚴地

菩薩悉充滿

〔疏〕五有一偈。頌二種體。上半頌日輪。下半頌微細寶

有刹寶燄成 燄雲覆其上 衆寶光殊妙

皆由業所得

〔疏〕第六偈。頌寶焰殊妙之言。亦兼香也。

或從妙相生 衆相莊嚴地 如冠共持戴

斯由佛化起

〔疏〕第七偈頌寶冠寶冠亦佛化變。非正頌佛化也。或從心海生 隨心所解住 如幻無處所 一切是分別

〔疏〕第八偈頌一念普現境界

或以佛光明 摩尼光爲體 諸佛於中現 各起神通力

〔疏〕第九偈頌一切寶莊嚴示現。及頌後三體。摩尼光者頌菩薩形寶。及寶華葉。佛光明者。頌佛音聲。

聲光成刹故

或普賢菩薩 化現諸刹海 願力所莊嚴

一切皆殊妙

〔疏〕第十偈。結歸普賢 第四體性竟

○第五段刹莊嚴中。唯明淨刹

爾時普賢菩薩復告大眾言。諸佛子。應知世界海有種種莊嚴。所謂或以一切莊嚴具中出上妙雲莊嚴。或以說一切菩薩功德莊嚴。或以說一切衆生業報莊嚴。或以示現一切菩薩願海莊嚴。或以表示一切三世佛影像莊嚴。或以一念頃示現無邊劫神通境。

界莊嚴。或以出現一切佛身莊嚴。或以出現一切寶香雲莊嚴。或以示現一切道場中諸珍妙物光明照耀莊嚴。或以示現一切普賢行願莊嚴。如是等有世界海微塵數。

〔疏〕其中或寶為嚴。或人或法。或說法修行。示現融攝。皆為嚴利。以人法為寶故。又由說法因等得莊嚴果。以果名因為莊嚴也。〔鈔〕或寶為嚴者。然莊嚴淨。則眾寶為嚴。二在處眾。生淨。即人寶為嚴。三法門流布淨。即以法為嚴。對文可知。

爾時普賢菩薩欲重宣其義。承佛威力。觀察十方而說頌言。

廣大刹海無有邊

皆由清淨業所成

種種莊嚴種種住

一切十方皆徧滿

〔疏〕十頌分二初一總顯刹嚴

無邊色相寶燄雲

廣大莊嚴非一種

十方刹海常出現

普演妙音而說法

菩薩無邊功德海

種種大願所莊嚴

此土俱時出妙音

普震十方諸刹網

衆生業海廣無量

隨其感報各不同

於一切處莊嚴中

皆由諸佛能演說

三世所有諸如來

神通普現諸刹海

一一事中一切佛

如是嚴淨汝應觀

過去未來現在劫

十方一切諸國土

於彼所有大莊嚴

一一皆於刹中見

一切事中無量佛

數等衆生徧世間

爲令調伏起神通

以此莊嚴國土海

一切莊嚴吐妙雲

種種華雲香燄雲

摩尼寶雲常出現

刹海以此爲嚴飾

十方所有成道處

種種莊嚴皆具足

流光布迥若彩雲

於此刹海咸令見

普賢願行諸佛子

等衆生劫勤修習



無邊國土悉莊嚴 一切處中皆顯現

疏後九別頌上文於中初一偈頌初妙雲次一偈頌第二菩薩功德及第四菩薩願海次一偈卻頌說眾生業報後六偈如次頌後六事第五莊嚴竟

○第六段明刹清淨方便

爾時普賢菩薩復告大眾言諸佛子應知世界海有世界海微塵數清淨方便海

疏清淨方便者唯約淨也若約隨宜攝物佛應統之則淨穢皆稱佛土若就行致唯淨非穢創若就

即生公意彼淨名注云行致淨土非造之也造於上者眾生類矣十四科中釋致義云問云何致而

非得耶。答。夫稱致者。體爲物假。雖獲非已。釋曰。謂因他而得。故名爲致。謂佛修萬行。直趣真極。不取色相。他受用等。因他衆生。遂以大悲爲物取。然淨土。故云行致。既因萬行而致於土。必招淨也。然淨有二種。一世間淨。離欲穢故。以六行爲方便。二界爲淨土。言以六行爲方便者。謂欣上靜妙。離厭二下苦粗障故。以色無色界而爲淨土。二出世間淨。此復二種。一者出世。所謂二乘。以緣諦爲方便。權教說之。無別淨土。約實言者。出三界外。別有淨土。二乘所居。智論有文。二出世間上上淨。此謂菩薩。卽以萬行而爲方便。以實報七珍無量莊嚴而爲其土。今此正明菩薩。兼顯二乘。然出世上上淨中。復有二種。一者真極。佛自受用。相累兼

亡而爲方便。二者未極。等覺已還。故仁王云。三賢  
十聖住果報。唯佛一人居淨土。未極之中。復有二  
種。一八地以上。一向清淨。以永絕色累。照體獨立。  
神無方所。故其淨土。色相難名。一七地已還。未出  
三界。無漏觀智有間斷故。非一向淨。若依瑜伽。入  
初地去。方爲淨土。三賢所居。皆稱非淨。此分受用  
變化別故。約此經宗。十信菩薩。卽有淨土。故今此  
文。始自近友。終成佛力。皆淨方便。故通萬行。然淨  
方便。卽是淨因。長行亦可爲等流果。如云。久近善  
友。得生有善友之刹中故。卽十事皆淨相也。然望

莊嚴有同。約門別故。望具因緣。當知亦爾。又起具  
因緣。通於染淨。此則唯淨。莊嚴多約其果。清淨多  
約其因。又前多修善。此多治惡。故於世界。此如洗  
滌。彼如粉繪。

所謂諸菩薩親近一切善知識同善根故。增長廣大  
功德雲徧法界故。淨修廣大諸勝解故。觀察一切菩  
薩境界而安住故。修治一切諸波羅蜜悉圓滿故。觀  
察一切菩薩諸地而入住故。出生一切淨願海故。修  
習一切出要行故。入於一切莊嚴海故。成就清淨方  
便力故。如是等有世界海微塵數。

疏別釋中。一近友同善根者。如善財夜神處廣說。  
二智導慈雲。大彌法界。三法門勝解。皆已淨治。約  
位地前也。四卽初地證徧行如。故云觀察一切境  
界。生如來家。故云安住。五修治等者。見道之後修  
道位故。餘雖未滿。一切皆修。若約圓融。亦得稱滿。  
六初地勝進。徧學十地行法。後後但是依法行故。  
上三皆初地。七初地發願。順行至第八地。一切皆  
成。故名出生一切願海。而言淨者。純無漏故。八卽  
九地。二乘出要。唯止與觀。菩薩出要。唯無礙辨。令  
衆出故。九一切莊嚴者。十地二嚴。皆成滿故。十淨

方便力。卽是普賢佛功德也。十中前三變化淨因。後七受用淨因。上欲總收諸土。故依次豎配。若約橫修。初心卽可圓具其十。鈔如善財者。七十二經。初見。起於善知識。同已等十心。便得佛刹微塵數。同行。所謂同念心。常憶念十方三世佛。故同慧心。分別決定一切法。故等。廣如彼說。此下數段。皆如十地經文。

爾時普賢菩薩欲重宣其義。承佛威力。觀察十方而說頌言。

一切刹海諸莊嚴

無數方便願力生

一切刹海常光耀

無量清淨業力起

疏其十頌中。九偈分二。初一總明能所淨。前半方

便後半清淨。皆上句果。下句因。

久遠親近善知識

同修善業皆清淨

慈悲廣大徧衆生

以此莊嚴諸刹海

一切法門三昧等

禪定解脫方便地

於諸佛所悉淨治

以此出生諸刹海

發生無量決定解

能解如來等無異

忍海方便已修治

故能嚴淨無邊刹

爲利衆生修勝行

福德廣大常增長

譬如雲布等虛空

一切刹海皆成就

〔疏〕後八別頌前文。於中初四如次頌上四淨。初地

慈悲爲首故云爲生修行徧滿真如故云廣大

諸度無量等刹塵

悉已修行令具足

願波羅蜜無有盡

清淨刹海從此生

〔疏〕第五偈頌修治淨及超頌第七願淨以願通初地八地此據初地故超頌也

淨修無等一切法

生起無邊出要行

種種方便化羣生

如是莊嚴國土海

〔疏〕第六偈頌前第八出要

修習莊嚴方便地

入佛功德法門海

普使衆生竭苦源

廣大淨刹皆成就



疏第七偈頌第九及卻頌觀菩薩地地義通前後故

力海廣大無與等

普使衆生種善根

供養一切諸如來

國土無邊悉清淨

疏第八偈頌方便力上來且配長行其間亦兼餘義。第六清淨竟

○第七段佛出差別

爾時普賢菩薩復告大衆言。諸佛子。應知一一世界海。有世界海微塵數佛出現差別。所謂或現小身。或現大身。或現短壽。或現長壽。或唯嚴淨一佛國土。或

有嚴淨無量佛土。或唯顯示一乘法輪。或有顯示不可思議諸乘法輪。或現調伏少分衆生。或示調伏無邊衆生。如是等有世界海微塵數。

〔疏〕十事五對。於海及種。有此差別。五中初二隨彼類故。次一緣廣。陞故。次一隨機。宜故。五熟未熟故。

〔鈔〕初二隨彼類者。如佛出娑婆。但可丈六。若生極樂。無量由旬。不可無邊。身如來。以化三尺衆生。丈六之佛。化萬丈之人。壽亦然矣。居於此刹。不滿百年。彌陀人民。壽皆無量。然此一對。亦通化機多少。次一緣廣。陞者。緣廣則利廣。如文殊。普見之邦。緣陞則利陞。如迦葉。光德之國。三宜聞二。則祕一。乘之妙寶。宜聞一。則廢羊鹿之小車。根熟者。化多。如釋迦之化。未熟則化少。如須扇多如來。亦是因中緣廣。陞故。

爾時普賢菩薩欲重宣其義承佛威力觀察十方而說頌言

諸佛種種方便門

出興一切諸刹海

皆隨衆生心所樂

此是如來善權力

〔疏〕十頌分三。初一頌總標

諸佛法身不思議

無色無形無影像

能爲衆生現衆相

隨其心樂悉令見

或爲衆生現短壽

或現住壽無量劫

法身十方普現前

隨宜出現於世間

或有嚴淨不思議

十方所有諸刹海

或唯嚴淨一國土

於一示現悉無餘

或隨衆生心所樂

示現難思種種乘

或有唯宣一乘法

一中方便現無量

或有自然成正覺

令少衆生住於道

或有能於一念中

開悟羣迷無有數

**疏**次五偈別釋如次頌前五對

或於毛孔出化雲

示現無量無邊佛

一切世間皆現觀

種種方便度羣生

或有言音普周徧

隨其心樂而說法

不可思議大劫中

調伏無量衆生海

或有無量莊嚴國

衆會清淨儼然坐

佛如雲布在其中

十方剎海靡不充

諸佛方便不思議

隨衆生心悉現前

普住種種莊嚴刹

一切國土皆周徧

多。第七佛出差別竟

○第八段劫住不同

爾時普賢菩薩復告大衆言。諸佛子。應知世界海有世界海。微塵數劫住。所謂或有阿僧祇劫住。或有無量劫住。或有無邊劫住。或有無等劫住。或有不可數

劫住。或有不可稱劫住。或有不可思劫住。或有不可量劫住。或有不可說劫住。或有不可說不可說劫住。如是等有世界海微塵數。

〔疏〕謂刹任經停時分也。隨能感因有長短故。長行畧列有十大數。更有多少不同。如標結中。及頌所顯。竝通諸刹。不謂淨長。如大地獄。其壽更長。人趣卻促。故極惡極善。受時卽多。更約異門。亦不可定也。十中唯九者。欠不可說不可說也。竝如阿僧祇品。

爾時普賢菩薩欲重宣其義。承佛威力。觀察十方而

說頌言

世界海中種種劫

廣大方便所莊嚴

十方國土咸觀見

數量差別悉明了

我見十方世界海

劫數無量等衆生

或長或短或無邊

以佛音聲今演說

〔疏〕偈中十頌。然劫但時分。無別義理。故此偈文轉勢頌之。畧分爲三。初二總標許說。頌上標也。

我見十方諸刹海

或住國土微塵劫

或有一劫或無數

以願種種各不同

〔疏〕次有一偈。通頌上列。兼顯修短之因。以願力故。

或有純淨或純染

或復染淨二俱雜

願海安立種種殊

住於眾生心想中

〔疏〕餘七頌總結。偈各一義。一明修短。通於染淨。結

以心想

往昔修行刹塵劫

獲大清淨世界海

諸佛境界具莊嚴

永住無邊廣大劫

〔疏〕二淨劫住久釋以因淡

有名種種寶光明

或名等音燄眼藏

離塵光明及賢劫

此清淨劫攝一切

〔疏〕三列諸劫名。染淨相攝



有清淨劫一佛興 或一劫中無量現

無盡方便大願力 入於一切種種劫

〔疏〕四佛興願異。故入劫不同

或無量劫入一劫 或復一劫入多劫

一切劫海種種門 十方國土皆明現

〔疏〕五一多互融。齊攝雙現

或一切劫莊嚴事 於一劫中皆現觀

或一劫內所莊嚴 普入一切無邊劫

〔疏〕六時法相攝。普入無邊

始從一念終成劫 悉依衆生心想生

一切剎海劫無邊

以一方便皆清淨

〔疏〕七結由想心。示以方便。一方便者。卽了唯心也。

一念與劫。竝由想心。心想不生長。短安在。非長非

短。是謂清淨。不壞於相。則劫海無邊。鈔一念與劫

便之義。然一念與劫。竝由想心。此有二意。一者由

有想念。卽有利那。積此利那。終竟成劫。心想若滅

生成。長絕。此順經文。二者一切境界。皆依妄念。而

有差別。若離心念。則無一切境界之相。此順經意

成。唯心觀是故。疏云。心想不生。長短安在。無長無

短。卽心體清淨。是以經言。以一方便皆清淨也。此

約真性故。第二句是不壞相義。性相無礙。剎海義也。

○第九段劫轉變差別

第八劫任意

爾時普賢菩薩復告大眾言。諸佛子。應知世界海有

世界海微塵數劫轉變差別

〔疏〕劫轉變差別者。此有二種。一者但約感成住壞

劫皆名轉變。二唯約住劫之中。居人善惡。令染淨

轉變。鈔二唯約住劫之中。居人善惡。復有二義。一約衆生引因所得。二約菩薩居中作用。心純

善故染淨  
交徹耳

所謂法如是故。世界海無量成壞劫轉變

〔疏〕釋中具二。初一卽是前義。故云無量成壞劫轉

變。言法爾者。法爾隨業轉也。若爾。何異起具因緣。

因緣意在於因。轉變意彰於異。

染汙衆生住故。世界海成染汙劫轉變。

疏餘九釋後義一遇惡緣故淨變為染下文云泉池皆枯涸等。鈔遇惡緣故變淨為染。即是經中染邑大王未出時一切不可樂。猶如餓鬼處。衆生相殺害竊盜縱淫佚。兩舌不實語。無義粗惡言。貪愛他財物。瞋恚懷毒心。邪見不善行。命終墮惡道。以是等衆生愚痴所覆蔽。在於顛倒見。上惡緣也。天早不降澤。以無時雨故。百穀悉不生。草木皆枯槁。泉流亦乾竭。大王未興世。河池悉枯涸。園苑多骸骨。望之如曠野。自劫變也。

### 修廣大福衆生住故世界海成染淨劫轉變

疏二修人天大福令世界多染少淨故先云染如

下文云粳米自然生等。鈔粳米自然生等。即是上經次文云。大王升寶位。廣

濟諸羣生。油雲被八方。普雨皆充洽。乃翻十惡成其十善。其中翻偷盜云。往昔諸衆生。貧窮少衣服。

以草自遮蔽。饑羸如餓鬼。大王既興世。粳米自然生。樹中出妙衣。男女皆嚴飾。即其事也。

信解菩薩住故。世界海成染淨劫轉變。

〔疏〕二即地前。以未斷障。故非純淨。以淨多故。故先

云淨。經多云染淨。與前何別。或譯人之失。或傳寫

之誤。鈔即地前者。信解是地前通稱。亦名勝解。行住未證真如。但依解力而修行故。

無量眾生發菩提心故。世界海純清淨劫轉變。

〔疏〕四即證發心。居受用上。故但云純淨。

諸菩薩各各遊諸世界故。世界海無邊莊嚴劫轉變。

〔疏〕五各各游者。即二地至十地諸菩薩游戲神通。

以多莊嚴而嚴一刹。或以一嚴而嚴多刹。所至染

利則能莊嚴也。鈔以多莊嚴者如第五迴向即願普攝十方三世所有佛刹一切莊嚴而嚴一刹。一切亦然。至登地竟能如願成。如八地十地中說。或以一嚴而嚴多刹者。第二迴向云。以一莊嚴嚴一切。亦不如法生分別。如是開悟諸衆生。一切無性無所觀。

十方一切世界海諸菩薩雲集故。世界海無量大莊

嚴劫轉變

疏六大莊嚴者。即普賢位。嚴於微塵內刹。如上口

光召衆等是。鈔如上口光召衆者。即第六經。其諸菩薩既至會中。現自在用云。如是坐

已。其諸菩薩身毛孔中。一各現十世界海微塵數。一切寶種種色光明。一光中現十世界海微塵數。諸菩薩皆坐蓮華藏師子之座。此諸菩薩悉能徧入一切法界。諸安立海所有微塵。彼一一塵中。皆有十佛世界。微塵數諸廣大刹。一一刹中。皆有二世諸佛世尊。此諸菩薩悉能徧往親近供養。

等。卽嚴淨  
塵中刹也。

諸佛世尊入涅槃故。世界海莊嚴滅劫轉變。

疏七莊嚴滅者。此明失善緣而惡現。謂如來示滅。

能事隨滅。佛滅百年。乳不及水。况今之世。况於滅。

極。稗為上味。鐵為上嚴。鈔佛滅百年者。育王經說。育王常供養諸聖僧。上座

食乳稍多。育王白言。乳若多。食恐生疾患。上座云。此乳有何力。不及世尊在世時水。今佛滅度。一切

精淳皆沉地下。育王願見佛在時水。上座展手。地下取水。育王嘗之。實過於乳。明知福人滅矣。能事

隨滅百年。尚爾。况今去聖。將二千年。尤更淡薄。况於滅極。鐵為上嚴。稗為上味。如起世經說。

諸佛出現於世故。一切世界海廣博嚴淨劫轉變。

疏八如彌勒來也。鈔如彌勒來者。卽彌勒下生。經說佛告舍利弗云。四大海水以

漸減少三千由旬。是時閻浮提地長十千由旬。廣八千由旬。平坦如鏡。名華軟草。徧覆其地。種種樹木。華果茂盛。其樹悉皆高三十里。城邑次比。雞飛相及。人壽八萬歲。智慧威德。色力具足。安隱快樂。有一大城。名翅頭末底。長十二由旬。廣七由旬。其城七寶。上有樓閣。戶牖軒牕。皆是衆寶。真珠網覆。街廣十二里。巷陌處處皆有明珠柱。處處皆有金銀之聚。便利不淨。地裂受之。受已還合。亦無衰惱。水火刀兵。及諸饑饉毒害之事。園林池沼。八功德水。衆華異香。皆悉盈滿。不生草穢。一種七穫。味甚香美。增益色力。等。廣如彼說。

如來神通變化故。世界海普清淨劫轉變。如是等有世界海微塵數。

疏九以佛神通。于何不淨。淨名足指按地。法華三變淨土。卽其類也。鈔淨名足指按地者。卽佛國品說隨其心淨則佛土淨。爾時舍



利弗承佛威神。作是念。若菩薩心淨。則佛土淨。若我世尊本爲菩薩時。意豈不淨。而是佛土不淨。若此佛知其意。卽告之言。我此土淨。而汝不見。爾時世尊。卽以足指按地。卽時三千大千世界。若干百千衆寶嚴飾。譬如寶莊嚴佛。無量功德寶莊嚴土。一切大衆。歎未曾有。而皆自見坐寶蓮華等是也。法華三變淨土。卽見寶塔品。大樂說請開塔戶。佛言。須集分身。大樂說請集分身。世尊放光遠召。爲欲受分身佛故。一變娑婆。二於八方。各更變二百萬億那由他國土。皆令清淨。坐佛不足。第三更變二百萬億那由他國土。皆令清淨。故云三變。上之十事。初總餘別。不出業故。又初二屬凡。次四菩薩。後三屬佛。又約佛菩薩。卽染令淨。約於凡夫。卽淨成染。

爾時普賢菩薩。欲重宣其義。承佛威力。觀察十方而說頌言。

一切諸國土	皆隨業力生	汝等應觀察
轉變相如是	染汙諸衆生	業惑纏可怖
彼心令刹海	一切成染汙	若有清淨心
修諸福德行	彼心令刹海	雜染及清淨
信解諸菩薩	於彼劫中生	隨其心所有
雜染清淨者	無量諸衆生	悉發菩提心
彼心令刹海	住劫恒清淨	無量億菩薩
往詣於十方	莊嚴無有殊	劫中差別見
一一微塵內	佛刹如塵數	菩薩共雲集
國土皆清淨	世尊入涅槃	彼土莊嚴滅

衆生無法器 世界成雜染 若有佛興世  
一切悉珍好 隨其心清淨 莊嚴皆具足  
諸佛神通力 示現不思議 是時諸刹海  
一切普清淨

〔疏〕十頌如次頌前可知 第九劫轉變差別竟

○第十無差別

爾時普賢菩薩復告大衆言。諸佛子。應知世界海有  
世界海微塵數無差別

〔疏〕無差別者。謂前九辨諸世界。約相不同。隨業染  
淨。由於衆生有差別故。今云無差別。性無二故。故偈

云業性起也。創謂前九下。皆釋標名。於中有二。一約性相相對。相則有差。性則無差。

又約權設。則種種差別。今約實說。則一切無差。如

教法中。或說三乘。卽是差別。說華嚴時。一切無差。

又約權設下。二約權實相對。實則無差。又皆是諸佛之所用故。一一

融攝等無異故。故前九差別。是此無差之差。今此

卽是前九差之無差也。故法華云。衆生見燒淨土

不毀。二皆相卽。由依此義。說淨土中十八圓滿。一

一稱真。皆周徧故。又皆是諸佛下。三收差與無差。皆歸果用。前之二對。性相權實。

二不相卽。今則融卽。言無差之差者。是圓融之行。布也。差之無差者。是行布之圓融也。若離圓融。非圓教法。若無差別。無可圓融。如攬別成總。非離別外。而有此總。故法華下。但明二不相離。由依此義。

下。顯十八圓  
滿。由此而成。

所謂一一世界海中。有世界海微塵數世界無差別。  
一一世界海中。諸佛出現所有威力無差別。一一世  
界海中。一切道場徧十方。法界無差別。一一世界海  
中。一切如來道場衆會無差別。一一世界海中。一切  
佛光明徧法界無差別。一一世界海中。一切佛變化  
名號無差別。一一世界海中。一切佛音聲普徧世界  
海無邊劫。住無差別。一一世界海中。法輪方便無差  
別。一一世界海中。一切世界海普入一塵無差別。一  
一世界海中。一微塵。一切三世諸佛世尊廣大境。

界皆於中現無差別諸佛子。世界海無差別。略說如是。若廣說者。有世界海微塵數無差別。

疏二釋中十事。一海中包數同。則盡海之塵。一塵一刹。已是含攝之義。二佛示威力同。三道場同。同真性故。四衆會同。常隨衆故。五光明。六名號。七音聲。八法輪方便。上七皆約不動一而普徧無差。九塵含刹海。十塵容佛境。此二約不壞相而廣容無差。

爾時普賢菩薩。欲重宣其義。承佛威力。觀察十方而說頌言。

一微塵中多刹海

處所各別悉嚴淨

如是無量入一中

一一區分無雜越

一一塵內難思佛

隨衆生心普現前

一切刹海靡不周

如是方便無差別

一一塵中諸樹王

種種莊嚴悉垂布

十方國土皆同現

如是一切無差別

一一塵內微塵衆

悉共圍繞人中主

出過一切徧世間

亦不迫隘相雜亂

一一塵中無量光

普徧十方諸國土

悉現諸佛菩提行

一切刹海無差別

一一塵中無量身

變化如雲普周徧

以佛神通導羣品

十方國土亦無別

一一塵中說衆法

其法清淨如輪轉

種種方便自在門

一切皆演無差別

一塵普演諸佛音

充滿法器諸衆生

徧住刹海無央劫

如是音聲亦無異

刹海無量妙莊嚴

於一塵中無不入

如是諸佛神通力

一切皆由業性起

一一塵中三世佛

隨其所樂悉令見

體性無來亦無去

以願力故徧世間



〔疏〕頌中。十頌如次。頌上十義。但第六約身。與前名體異耳。而前但約平漫無差。今顯塵內重疊融攝。無差之義。第十無差別竟。

〔論〕此之一品。答前三十七問。意令現在未來發菩提心者。識佛所行。衆生業海無際。如來以普賢行。普濟以法性理智無礙。從初發心。興大願雲。悲智普覆。以波羅密海。無利不現其身。無行不同其事。塵毫內利。影現重重。平等智身。莫不隨入。以法界之體。而無往來。法常如是。令學者做之。趣求不謬。此乃如大王路。法爾常然。更有異求。偏僻不當也。

世界成就品竟

寶善菴比丘道節太禧及合山衆等同  
刻  
華嚴經世界成就品疏論纂要第十五  
卷伏願衆等發菩提心等善財之徧參  
知識踞華藏海同毘盧之萬德圓明羅  
身雲於性天興願行於塵刹皆資三有  
仰報四恩  
康熙庚申年夏月  
日華藏室題

大方廣佛華嚴經疏論纂要卷第十五